

# ДЕНЬ СВЯТОЙ ТРОИЦЫ. ПЯТИДЕСЯТНИЦА

Коленопреклоненные молитвы



# ДЕНЬ СВЯТОЙ ТРОИЦЫ. ПЯТИДЕСЯТНИЦА

## На вечерне коленопреклонения

*После отпуста Литургии читаем девятый час  
[можно прочитать его и перед Литургией.]*

**Затем начальный возглас вечерни:**

*Благословен Бог наш:*

**Затем чтец:** Придите поклонимся: и Пс. 103.

## Ектения Великая

**Диакон:** Миром Господу помолимся.

**Хор:** Господи, помилуй.

О свышнем мире и спасении душ наших Господу помолимся.

О мире всего мира, благостоянии Святых Божиих Церквей  
и соединении всех Господу помолимся.

О святем храме сем и с верою, благоговением и страхом Божиим  
входящих в онь Господу помолимся.

О великом господине и отце нашем, Святейшем Патриархе **(имя)**,  
и о господине нашем Преосвященнейшем митрополите **(или**

**архиепископе, или епископе)** **(имя)**, честнем пресвитерстве, и еже во  
Христе диаконстве и о всем причте и людех Господу помолимся.

О богохранимей стране нашей, властех и воинстве ея, Господу  
помолимся.

О граде сем (или о веси сей, или о святей обители сей), всяком  
граде, стране и верою живущих в них Господу помолимся.

О благорастворении воздухов, о изобилии плодов земных  
и временех мирных Господу помолимся.

О плавающих, путешествующих, недугующих, страждущих, плененных и о спасении их Господу помолимся.

О предстоящих людех и ожидающих благодати Святаго Духа, Господу помолимся.

О приклоняющих сердца своя пред Господем и колена, Господу помолимся.

О еже укрепитися нам к совершению богоугодне, Господу помолимся.

О еже низпослатися богатым милостем Его на ны, Господу помолимся.

О еже прияти коленоприклонения наша яко фимиам пред Ним, Господу помолимся.

О требующих от Него помощи, Господу помолимся.

О избавитися нам от всякия скорби, гнева и нужды Господу помолимся.

Заступи, спаси, помилуй и сохрани нас, Боже, Твоею Благодатию. Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувше, сами себе, и друг друга, и весь живот наш Христу Богу предадим.

**Хор:** Тебе, Господи.

**Иерей:** Яко подобает Тебе всякая слава, честь и поклонение, Отцу, и Сыну, и Святому Духу, ныне и присно, и во веки веков.

**Хор:** Аминь.

## На «Господи воззвах» стихиры на 6, глас 4

Преславная днесь / видеша вси языцы во граде Давидове, / егда Дух сниде Святыи во огненных языцех, / якоже богоглаголивый Лука повествует, / глаголет бо: / собранным учеником Христовым, / бысть шум, якоже носиму дыханию бурну, / и исполни дом, идеже бяху сядяще: / и вси начаша глаголати странными глаголы, / странными учении, / странными повелении Святыя Троицы.

**[Дважды.]**

Дух Святыи бе убо присно, и есть, и будет: / ниже начинаемь, ниже престаяй, / но присно Отцу и Сыну счинен и счисляемь: / Живот, и животворяй, / Свет, и света податель, / самоблагий и источник благостыни: / Имже Отец познавается, и Сын прославляется, / и от всех познавается, / едина сила, едино счетание, / едино поклонение Святыя Троицы. **[Дважды.]**

Дух Святыи Свет и Живот, / и живый источник умный, / Дух премудрости, Дух разума, / благий, правый, умный: обладай, / очищаяй прегрешения: / Бог и боготворяй, / Огнь и от Огня происходяй: / глаголай, дей, разделяй дарования, / Имже пророцы вси, / и божественнии апостоли с мученики венчашася, / странное слышание, / странное видение, / огнь разделяйся в подаяние дарований. **[Дважды.]**

**Слава, и ныне, глас 6:** Царю Небесный, / Утешителю, Душе истины, / Иже везде сый / и вся исполняяй, / Сокровище благих / и жизни Подателю, / прииди и вселися в ны, / и очисти ны от всякия скверны, / и спаси, Блаже, души наша.

**Вход с кадилом.** Свете тихий:

## Прокимен, глас 7:

Кто Бог велий, яко Бог наш? / Ты еси Бог, творяй чудеса.

**Стих 1:** Сказал еси в людех силу Твою.

**Стих 2:** И рех: ныне начах, сия измена десницы Вышняго.

**Стих 3:** Помянух дела Господня, яко помяну от начала чудеса Твоя.

**И паки:** Кто Бог велий: **Пс 76:14Б-15А, 16А, 11, 12**

## Первая молитва

**Диакон:** Паки и паки, приклоньше колена, Господу помолимся.

**Хор:** Господи, помилуй. **[Трижды.]**

**Иерей:** Пречисте, нескверне, безначальне, невидиме непостижиме, неизследиме, непременно, непобедиме, неизчетне, незлобиве Господи, един имеяй безсмертие, во свете живый неприступном: сотворивый небо и землю, и море, и вся созданная на них, прежде еже просити, всем прошения подаваяй, Тебе молимся, и Тебе просим, Владыко Человеколюбче, Отца Господа и Бога и Спаса нашего Иисуса Христа, нас ради человеков, и нашего ради спасения сшедшаго с небес, и воплотившагося от Духа Святаго и Марии Приснодевы, и Преславныя Богородицы: Иже первее убо словесы уча, последи же и дела показуя, егда спасительную страсть претерпе, подаде нам подписание смиренным, и грешным, и недостойным рабом Твоим, мольбы приноситьи Тебе, в выи и колен преклонениих, о своих гресех,

и о людских неведениях. Сам Многомилостиве и Человеколюбче, услыши ны, вонже аще день призовем Тя, изряднее же в день сей пятидесятный, вонже по Вознесении Господа нашего Иисуса Христа на небеса, и седении одесную Тебе Бога и Отца, низпосла Святаго Духа на святых Своих ученики и апостолы, Иже и седе на едином коегождо их, и исполнишася вси неистощимыя благодати Его, и глаголаша языки иными величия Твоя, и прорекоша. Ныне убо молящихся Тебе, услыши нас, и помяни нас, смиренных и осужденных, и возврати пленение душ наших, Твое милование имея о нас молящееся. Приими нас, припадающих Тебе, и вопиющих: согрешихом, к Тебе привержени есмы от утробы, от чрева матери нашея, Ты еси Бог наш. Но яко исчезоша в суете дние наши, обнажихомся Твоея помощи, лишихомся всякаго ответа, но дерзающе на щедроты Твоя, зовем: грехи юности нашея и неведения не помяни, и от тайных наших очисти нас, и не отрини нас во время старости, вегда оскудети крепости нашей: не остави нас, прежде даже нам в землю не возвратитися, сподоби к Тебе возвратитися, и вонми нам благоприятием и благодатию. Возмери беззакония наша щедротами Твоими, сопротив постави бездну щедрот Твоих множеству согрешений наших. Призри с высоты святых Твоя Господи, на предстоящих люди Твоя, и чающих еже от Тебе богатых милости. Посети нас благостию Твоею, избави нас от насильства диаволя: утверди живот наш святыми Твоими и священными законы. Ангела, верна хранителя пристави людям Твоим, всех собери в Твое Царствие. Дажь прощение уповающим на Тя: остави им и нам грехи. Очисти нас действием Святаго Твоего Духа: разруши яже на нас козни вражия.

Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувшие, сами себе, и друг друга, и весь живот наш Христу Богу предадим.

**Хор:** Тебе, Господи.

**Иерей:** Ты бо еси упокоение душ и телес наших, и Тебе славу возсылаем, Отцу, и Сыну, и Святому Духу, ныне и присно, и во веки веков.

*Далее окончание вечерни обычным порядком:*

### **Ектения Исполним вечернюю:**

**Иерей:** Мир всем.

**Хор:** И духови твоему.

**Диакон:** Главы наша Господеви приклоним.

**Хор:** Тебе, Господи.

### **Молитва главопреклонения**

Господи Боже наш, приклонивый небеса, и сщедый на спасение рода человеческого, призри на рабы Твоя, и на достояние Твое! Тебе бо страшному и Человеколюбцу Судии, Твои раби своя приклониша главы и своя покориша выи не от человек ожидающе помощи, но Твоя ожидающе милости, и Твоего чающе спасения: яже сохрани на всякое время, и в настоящем часе же и вечере и в приходящую ночь, от всякаго врага, от всякаго сопротиволежащаго действия диавольскаго, помышлений суетных, и воспоминаний лукавых.



Буди держава Царствия Твоего благословенна и препрославленна, Отца, и Сына, и Святаго Духа, ныне и присно, и во веки веков.

**Хор:** Аминь.

### **Присовокупляет же и сию молитву:**

Благословен еси Господи Владыко Вседержителю, просветивый день светом солнечным, и ночь уяснивый зарями огненными, долготу дневную преити нам сподобивый, и приблизитися начатком ночи: услыши моления наша, и всех людей Твоих, и всем нам простив вольныя и невольныя грехи. Приими вечерняя наша моления, и низпосли множество милости Твоея, и щедроты Твоя на достояние Твое. Остени нас святыми ангелы Твоими, вооружи нас оружием правды Твоея, огради нас истиною Твоею, соблюди нас силою Твоею, избави нас от всякаго обстояния, всякаго навета сопротиволежащаго. Подаждь же нам и настоящий вечер, с приходящею нощию, совершен, свят мирен, безгрешен, безсоблазнен, безмечтанен, и вся дни живота нашего: молитвами святыя Богородицы, и всех святых от века Тебе благоугодивших.

**Диакон:** Заступи, спаси, помилуй, возстави, и сохрани нас Боже Твоею благодатию.

**Хор:** Господи, помилуй.

**Иерей:** Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувше, сами себе, и друг друга, и весь живот наш Христу Богу предадим.

**Хор:** Тебе, Господи.



**Иерей:** Твое бо есть, еже миловати, и спасати нас, Господи Боже наш, и Тебе славу возсылаем, Отцу, и Сыну, и Святому Духу, ныне и присно и во веки веков.

**Хор:** Аминь.

## Сугубая ектения

**Диакон:** Рцем вси от всея души, и от всего помышления нашего рцем.

**Хор:** Господи, помилуй.

**Диакон:** Господи Вседержителю Боже отец наших, молим Ти ся, услыши и помилуй.

**Диакон:** Господи, помилуй.

**Диакон:** Помилуй нас Боже, по велицей милости Твоей, молим Ти ся, услыши и помилуй.

**Хор:** Господи, помилуй. **[Трижды.]**

**Иерей:** Еще молимся о великом господине и отце нашем, Святейшем Патриархе **(имя)**, и о господине нашем Преосвященнейшем митрополите **(или архиепископе, или епископе) (имя)**, и о всей во Христе братии нашей.  
Еще молимся о богохранимей стране нашей, властех, и воинстве ея, да тихое и безмолвное житие поживем во всяком благочестии и чистоте.  
Еще молимся о блаженных и всегда поминаемых создателях святого храма сего **(или: святой обители сей)**, и о всех прежде почивших отцах и братьях **(и сестрах)** наших, здесь и повсюду лежащих, православных.  
Еще молимся о милости, жизни, мире, здравии, спасении,

посещении, прощении и оставлении грехов рабов Божиих, братии и прихожан святого храма сего **(или: святой обители сей)**.

Еще молимся о плодоносящих, и добродееющих, во святем и всечестнем храме сем, труждающихся, поющих, и предстоящих людех, ожидающих от Тебе великия и богатыя милости.

**Иерей:** Яко милостив и человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

**Хор:** Аминь.

## **Вторая молитва**

**Диакон:** Паки и паки приклонше колена, Господу помолимся.

**Хор:** Господи, помилуй. **[Трижды.]**

*Преклоняем колена.*

**Иерей:** Господи Иисусе Христе Боже наш, мир Твой подавый человеком, и Пресвятаго Духа дар, еще в житии и с нами сый, в наследие неотъемлемое верным присно подаваяй: явленнейше же сию благодать Твоим учеником и апостолом днесь низпославый, и сих устне огненными утвердивый языки: имиже весь род человеческий боговедение своим языком в слух уха приимше, светом Духа просветихомся, и прелести якоже тмы изменихомся, и чувственных и огненных язык раздаянием, и преестественным действием, еже в Тя веры научихомся, и Тебе богословити со Отцем и Святым Духом, во едином Божестве, и силе, и власти озарихомся. Ты убо Отчее сияние, существа и естества Его неизменное и недвижимое начертание, источниче премудрости

и благодати: отверзи и мне грешному устне, и научи мя, како достоин, и о ихже потреба молитися: Ты бо еси ведый многое грехов моих множество, но Твое благоутробие победит сих безмерное. Се бо страхом предстою Ти, в пучину милости Твоя отчаяние души моя поверг: окорми живот мой словом всю тварь неизреченною премудрости силою управляяй, тихое обуреваемых пристанище, и скажи ми путь, вонже пойду. Дух премудрости Твоя моим подаждь помышлением, Дух разума безумию моему даруяй, Духом страха Твоего моя осени дела, и Дух Правый обнови во утробе моей, и Духом Владычним мыслей моих поползновение утверди: да на всяк день Духом Твоим Благим к полезному наставляемь, сподоблюся творити заповеди Твоя, и Твое присно памяствовати славное пришествие, и истязательное содеянных нами. И да не презриши мя тленными сопрельщатися мира сего красными, но будущих восприятия желати укрепи сокровищ. Ты бо рекл еси Владыко: яко елика аще кто просит о Твоем имени, невозбранно приемлет от Твоего присносущнаго Бога и Отца. Темже и аз грешный в пришествии Святаго Твоего Духа, Твою молю благодать, елика просих, воздаждь ми во спасение. Ей Господи, всякаго благодеяния богатый дателю, и подателю Благий, яко Ты еси подаваяй преизобильно ихже просим: Ты еси сострадателен и милостивый, Иже безгрешно быв плоти наша общник, и приклоняющим к Тебе колена, приклоняяйся любоблагоутробне, очищение же быв грехов наших. Даждь убо Господи, людем Твоим щедроты Твоя: услыши нас с небесе святаго Твоего: освяти нас силою спасительных десниц Твоя: покрый нас кровом крилу Твоею, да не презриши дел руку Твоею. Тебе единому согрешаем, но и Тебе единому служим. Не вемы кланятися богу чуждему, ниже простирати руки наша,

Владыко, к богу иному. Остави нам согрешения, и приим наша коленопоклонная моления, простри всем нам руку помощи, приими молитву всех яко кадило приятное, восприемлемое пред Твоим преблагим Царством.

### Присовокупляет же и сию молитву:

Господи, Господи, избавлей нас от всякия стрелы летящая во дни. Избави нас и от всякия вещи во тьме преходящая. Приими жертву вечернюю рук наших воздеяния. Сподоби же нас и ночное поприще без порока прейти неискушены от злых. И избави нас от всякаго смущения и боязни, яже от диавола нам прибывающия. Даруй душам нашим умиление, и помыслом нашим попечение, еже на страшнем и праведнем Твоем суде испытания. Пригвозди страху Твоему плоти наша, и умертви уды наша сущия на земли. Да и сонным безмолвием просветимся, зрением судеб Твоих. Отыми же от нас всякое мечтание неподобное и похоть вредну. Возстави же нас во время молитвы утверждены в вере, и преспевающия в заповедех Твоих.

**Диакон:** Заступи, спаси, помилуй, возстави, и сохрани нас Боже Твоею благодатию.

**Хор:** Господи, помилуй.

Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувшие, сами себе, и друг друга, и весь живот наш Христу Богу предадим.

**Хор:** Тебе, Господи.

**Иерей:** Благоволением и благостию единороднаго Сына Твоего, с Нимже благословен еси, с Пресвятым, и Благим, и Животворящим Твоим Духом, ныне и присно и во веки веков, аминь.

**Хор:** Аминь.

**Чтец:** Сподоби Господи:

**Хор:** Господи, помилуй. **[Трижды.]**

## **Третья молитва**

**Диакон:** Паки и паки приклонше колена, Господу помолимся.

*Преклоняем колена.*

**Иерей:** Приснотекущий, животный, и просветительный источниче, соприсносущная Отцу содетельная сило, все смотрение за спасение человеческое прекрасне исполнивый, Христе Боже наш, смерти узы неразрешимыя, и заклепы адовы расторгнувый, лукавых же духов множество поправый. Приведый Себе о нас непорочное заколение, и тело давый пречистое в жертву, всякаго греха неприкосновенное же и непроходное, и страшным сим, и неисповедимым священнодействием живот нам вечный даровавый: во ад сшедый, и верей вечныя сокрушивый, и во тме сидящим восход показавый: началозлобнаго же и глубиннаго змия богомудростным лыщением уловивый, и веригами мрака связавый в тартаре и огни негасимом, и во тме кромешней неисчетнословною Твоею затвердивый крепостию,

великоименитая Премудросте Отчая, напастуемым великий помощник явивыйся, и просветивый сидяция во тме и сени смертней. Ты славы присносущныя Господи, и Отца Вышняго Сыне возлюбленный, присносущный Свете от присносущнаго Света, Солнце правды, услыши нас, молящихся Тебе, и упокой души рабов Твоих, прежде усопших отец и братий наших, и прочих сродник по плоти, и всех своих в вере, о нихже и память творим ныне, яко в Тебе всех держава, и в руце Твоей содержиши вся концы земли. Владыко Вседержителю, Боже отец и Господи милости, рода смертнаго же и бессмертнаго, и всякаго естества человеческого Содетелю, составляемаго же, и паки разрешаемаго, живота же и скончания, еже zde пребывания, и еже тамо преложения: лета измеряяй живым, и времена уставляяй смерти, низводяй во ад и возводяй, связуяй в немощи, и отпускаяй в силе, настоящая потребне строяй, и будущая полезно управляяй, смертным жалом уязвленных воскресения надеждами веселяяй. Сам убо Владыко всех, Боже Спасителю наш, надежде всех концев земли, и сущих в мори далече, Иже и в сей последний и великий спасительный день Пятидесятницы праздника, тайну Святыя и Единосущныя, и соприсносущныя, и неразделимыя, и неслиянныя Троицы показавый нам, и наитие и пришествие Святаго и Животворящаго Твоего Духа, в виде огненных языков на святыя Твоя апостолы излиявый, и благовестники тех поставивый, благочестивыя нашея веры, и исповедники и проповедники истиннаго богословия показавый. Иже и в сей всесовершенный и спасительный праздник, очищения убо молитвенная, о иже во аде держимых сподобивый приимати, великия же подаваяй нам надежды

ослабления содержимым от содержащих я скверн, и утешению Тобою низпослатися. Услыши нас, смиренных, и Твоих раб молящихся Ти, и упокой души рабов Твоих, прежде усопших, на месте светле, на месте злачне, на месте прохлаждения: отонудуже отбеже всякая болезнь, печаль и воздыхание и учини духи их в селениях праведных, и мира и ослабления сподоби их: яко не мертвии восхвалят Тя, Господи, ниже сущии во аде исповедание дерзнут принести Тебе, но мы, живии, благословим Тя и молим, и очистительныя молитвы и жертвы приносим Тебе о душах их.

### Присовокупляет же и сию молитву:

Боже великий, и вечный, Святыи, человеколюбивый, сподобивый нас в сей час стати пред неприступною Твоею славою, на пение и хвалу чудес Твоих, очисти ны недостойныя рабы Твоя, и подаждь благодать еже сокрушенным сердцем, невозносительно приносити Тебе Трисвятое славословие, и благодарение великих Твоих даров, яже сотворил еси к нам, и твориши всегда в нас. Помяни Господи немощь нашу, и да не погубиши нас со беззаконии нашими, но сотвори великую милость со смирением нашим, да греховныя тмы избежавше, во дни правды ходити будем, и одеявшеся оружием света, ненаветно пребудем от всякия козни лукаваго, и со дерзновением прославим о всех, Тебе единого истинного и Человеколюбца Бога. Твое бо яко воистинну и великое вресноту таинство, Владыко всех, и Творче, временное решение Твоих тварей, и еже по сих совокупление, и упокоение еже во веки. Тебе благодать о всех исповедуем,



о входех наших, яже в мир сей, и исходех, надежды нам воскресения, и жизни нетленныя, Твоим неложным обещанием предобручают, яже примем в будущем втором пришествии Твоем. Ты бо еси и воскресения нашего Начальник, и поживших неумытный и человеколюбивый Судия, и мздовоздаяния Владыка и Господь, Иже и приобщивыйся нам приискренно плоти и крове, снизхождения ради крайняго: и наша страсти неотметныя, внемгда волею во искус поставити, примим за милосердие щедрот, и в немже пострадал еси Сам искусився, искушаемым нам быв самообещанный помощник: темже и совозвел еси нас в Твое безстрастие. Приими убо Владыко, мольбы и моления наша, и упокой вся отцы коегождо, и матери, и чада, и братию, и сестры единокровныя, и купнокровныя, и вся прежде почившия души: в надежди воскресения жизни вечныя учини души их, и имена в книзе животней, в недрах Авраама, и Исаака, и Иакова, в стране живых, в Царствии Небеснем, в раи сладости, светлыми ангелы Твоими, вводя вся во святыя Твоя обители, совоздвизаяй и телеса наша в день, вонже определил еси по святым Твоим и неложным обетованием. Несть убо Господи, рабом Твоим смерть, исходящим нам от тела, и к Тебе Богу нашему приходящим, но преставление от печальнейших на полезнейшая, и сладостнейшая, и на упокоение и радость. Аще же и что согрешихом к Тебе, милостив буди нам же и тем, зане ни един есть чист пред Тобою от скверн, ниже аще един день живота его есть, разве Ты точию един, на земли явивыйся безгрешный Господь наш Иисус Христос: Имже вси уповаем милость получитьи, и оставление грехов. Сего ради нам же и онем, яко Благ и Человеколюбец Бог, ослаби, остави, прости

грехопадения наша, вольная и невольная, яже в ведении и не в ведении, предъявленная и забываемая: яже в деянии, яже в помышлении, яже в словеси, яже во всех наших житиях и движениях. И отшедшим убо свободу и ослабу даруй, нас же сущих zde благослови, конец благий и мирный даруя нам же и всем людем Твоим, и милости и человеколюбия утробу отверзаяй нам, на страшном и ужасном Твоем пришествии, и Царствия Твоего достойных нас сотвори.

### Присовокупляет же и сию молитву:

Боже великий и вышний, едина имеяй безсмертие, во свете живый неприступном, всю тварь мудростию создавый, делимый посреде света, и посреде тмы. И солнце убо положивый во область дне, луну же и звезды во область ноци. Сподобивый нас, грешных, и в настоящий день предварити лице Твое во исповедании, и вечернюю Тебе службу принести. Сам Человеколюбче Господи, исправи молитву нашу, яко кадило пред Тобою, и приими ю в воню благоухания. Подаждь же нам настоящий вечер и приходящую ноць мирну: облещи ны оружием света, избави нас от страха ноцнаго, и от всякия вещи во тме преходящая. И даруй нам сон, иже во упокоение немощи нашей даровал еси, от всякаго диавольскаго мечтания изменен. Ей Владыко, всех благих подателю, яко да и на ложах наших умиляющесе воспомянем и в ноци пресвятое имя Твое. И поучением Твоих заповедей озаряеми, в радости душевной востанем к славословию Твоея благодати, молитвы и моления Твоему благоутробию приносяще о своих гресех, и о всех людех Твоих: ихже молитвами Пресвятыя Богородицы, в милости посети.

**Диакон:** Заступи, спаси, помилуй, возстави, и сохрани нас Боже Твоею благодатию.

**Хор:** Господи, помилуй.

**Иерей:** Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувшие, сами себе, и друг друга, и весь живот наш Христу Богу предадим.

**Хор:** Тебе, Господи.

**Иерей:** Ты бо еси упокоение душ и телес наших, и Тебе славу возсылаем, Отцу, и Сыну, и Святому Духу, ныне и присно, и во веки веков.

*Далее окончание вечерни обычным порядком:*

### **Ектения Исполним вечернюю:**

**Иерей:** Мир всем.

**Хор:** И духови твоему.

**Диакон:** Главы наша Господеви приклоним.

**Диакон:** Тебе, Господи.

### **Молитва главопреклонения**

Господи Боже наш, приклонивый небеса, и сщедый на спасение рода человеческого, призри на рабы Твоя, и на достояние Твое! Тебе бо страшному и Человеколюбцу Судии, Твои раби своя приклониша главы и своя покориша выи не от человек

ожидающе помощи, но Твоя ожидающе милости, и Твоего чающе спасения: яже сохрани на всякое время, и в настоящем часе же и вечере и в приходящую ночь, от всякаго врага, от всякаго сопротиволежащаго действия диавольскаго, помышлений суетных, и воспоминаний лукавых.

Буди держава Царствия Твоего благословенна и препрославленна, Отца, и Сына, и Святаго Духа, ныне и присно, и во веки веков.

**Хор:** Аминь.

### Стихиры на стиховне, глас 3

Ныне в знамение всем яве языцы быша: / иудеи бо от нихже по плоти Христос, / неверием недуговавше, Божия благодати отпадоша: / и Божественнаго света / сущии от языков сподобихомся, / утвердившеся словесы учеников, / вещающих славу Благодетеля всех Бога: / с нимиже сердца с коленами приклонше, / верою поклонимся Святому Духу, / утвердившеся Спасителем душ наших.

**Стих:** Сердце чисто созижди во мне Боже, и Дух Прав обнови во утробе моей.

Ныне облачатся державою Христовою с высоты апостоли: / обновляет бо их Утешитель, / в них обновляясь таинственным обновлением разума: / иже странными гласы, и высокоглаголивыми проповедающе / присносущное Естество же и простое, / триипостасное почитати, / Благодетеля всех Бога. / Темже просветившеся оных ученьми, / Отцу поклонимся с Сыном и Духом, / молящеся спастися душам нашим.

## **Слава, и ныне, глас 8:**

Приидите людие, / триипостасному Божеству поклонимся,  
/ Сыну во Отце, со Святым Духом: / Отец бо безлетно роди /  
Сына соприсносуцна и сопрестольна, / и Дух Святый бе во Отце  
с Сыном прославляемъ: / едина сила, едино существо, едино  
Божество. / Емуже покланяющесе вси глаголем: / Святый Боже,  
вся содеявый Сыном, / содейством Святаго Духа. / Святый  
Крепкий, Имже Отца познахом, / и Дух Святый прииде в мир: /  
Святый Безсмертный, утешительный Душе, / от Отца исходяй,  
и в Сыне почиваяй: / Троице Святая, слава Тебе.

## **Ныне отпускаеши:**

Трисвятое по Отче наш: **Тропарь праздника**, Премудрость: Суций  
благословен: Утверди Боже: Пресвятая Богородица: Честнейшую: Слава Тебе,  
Христе Боже: **Слава, и ныне:** Господи, помилуй [Трижды.], Благослови.

**Отпуст** Иже от Отчих и Божественных недр истощивый Себе, и с небесе  
на землю сошедый, и наше все восприемый естество,  
и обоживый е, по сих же на небеса паки возшедый и одесную  
седый Бога и Отца: Божественнаго же и Святаго и единосущнаго,  
и единосильнаго, и единославнаго, и соприсносуцнаго Духа  
низпославый на святых Своих ученики и апостолы, и Сим  
просветивый убо их, теми же всю вселенную: Христос истинный  
Бог наш, молитвами Пречистых и Пренепорочных святых Своей  
Матере, святых славных, прехвальных, богопроповедников,  
и духоносных апостолов, и всех святых, помилует и спасет нас, яко  
Благ и Человеколюбец.

**Хор:** Аминь.